

ULMA TALDEKO BESTE TALENTUAK

Taldeko langile eta bazkideek bateratu egiten dituzte beren ibilbide profesionala eta zaletasun zorrotzak, talentuarekin eta esfortzuarekin horma guztiak botatzen direla erakutsiz.

Mendigoizale petoa

Mikel Diez, ULMA Packaging

Mikel Diez ULMA Packagingeko zentro teknologikoko industrializazioko teknikaria da duela 7 urtetik, eta aire zabalean praktika daitezkeen kirol guztien zalea da, baina azken urteetan goi mendietan jarri du arretagunea.

Mikelek mendiaren alde duen grina gurasoek eskiatzeko transmititu zioten zaletasunetik dator. Mendiko eskia praktikatzen hasi zen, eski estazioetako saturazioetatik ihesi, eta horrek mendiaren neguko mundua ikusarazi zion. Aste Santu batean, familiarekin Alpeetan eskiatzen ari zela, Mont Blanc ikusi zuen lehen aldiz, eta bere buruari agindu zion egunen batean bertara igoko zela.

Zorionez, bikotekideak zaletasuna partekatzen du, eta aurrera egin dute elkarrekin: lehendabizi etxeko mendiak, gero Pirinioak, Alpeak, Andeak, Himalayara iritsi arte. Mendiaren aldeko grina horri esker, bestela ezagutuko ez zuten herrialde asko ezagutzeko aukera eman die, hala nola, Peru, Bolivia, Txile, Kazakhstan, Kirgizistan, Nepal edo India, eta urruneko eskualdeak ezagutu dituzte, zirkuitu turistiko eta komertzialetatik aparte, gugandik oso desberdinak diren jendeak eta kulturak lehen eskutik

ezagutuz; horri buruz dio zoragarria dela, eta oso aberasgarria.

2017an, Urretxuko adiskide on batekin batera, Kaxmirreko Indiako urruneko mendi batera abiarazi zuen espedizioa, NUN 7135m, eta Indiako enpresa bati kontratatatu zion logistika konplexua oinarrizko kanpamenturaino, bere espedizioa eta 4 indiarrez eta 4 sherpaz osatutako beste batekin elkartuta. Ekaitz indartsu batek 3 egun eta 3 gau bakartuta utzi zituen, gero eta okerrago, ez aurrera ez atzera egin ezinik, ertz estu batean, non juxtu denda jartzeko lekua baitzegoen, 100 km/h-ko haize bolada biziekin. Gainera, jatekorik gabe geratzen ari ziren, eta arrazionatu behar izan zuten, “oso gogorra izan zen, batez ere, psikologikoki. Burua oso garrantzitsua da horrelako espedizioetan”. Azkenean dena ongi ateratu zen, eta mendiak erraztasunik eman ez bazien ere, tontorrera iritsi ziren, eta horrela gainditu zuen bere lehen

7000koa.

“Zoragarria da mendian altuera horretan bakarrik aurkitzea, ez da batere ohikoa, eta oso gauza berezia izan zen”.

Espediziotik itzuli zenean Takolo beka eman zioten, ospe handiko beka izan ere, eta hori guztiz ustekabeko sorpresa izan zen, Mikelek dioenez. *“espedizio biribil baterako ahal zen amaierarik onena, bizitza osorako oroitzapen gogoangarria”.* *“Zaletasun honen gauzarik garrantzitsuenak izan da nire bizitzari ekarri dion guztia, gauza asko ikusteko modua aldatzen dizu, eta jende asko ezagutzeko aukera eman dit, gaur egun niretzat inportanteak diren pertsonak”*, kontatzen digu Mikelek.

Espedizioetarako behar den egoera fisikoa lortzeko eta mantentzeko, Mikelek beste kirol asko praktikatzen ditu, beti ingurune berean: haitzeko eskalada udan eta izotzetan neguan, trail running, mendiko bizikleta, mendiko eskia... urtaro

bakoitzean dagokiona. *“Uste dut negua noiz iritsi zain egoten diren gutxienetakoa naizela, baina asko disfrutatzen dut urteko urtaro bakoitzean”*, azaldu digu.

Joan den abenduan jaio zen Enaitz, lehen semea, eta horrek parentesi txiki bat eginarazi dio. Hilabete batzuk daramatza ia mendirik ukitu gabe, eta, dioenez, *“esango nuke horrek mesede ere egin didala”*.

Goi mendietako espedizioek hilabete bat edo bi behar dute, eta hori eta lana txertatzen zaila da, baina, dioskunez, *“araudiaren barruan kokatzen ziren planteamenduak egin izan ditudanean, zuzeneko arduradunek ahal izan dituzten erraztasun guztiak eman dizkirate beti, eta horregatik oso eskertuta nago”*.

Etorkizunean, Mikelek ez du baztertzen 14 8000koetako bat egitea, baina gauza asko lotu beharko lituzke saiatzeko, eta aitortzen du ez dela erraza.

